

Den cunuco na San Miguel:

CHINESNAN TA CULTIVA BERDURA CU NAN PROPIO SISTEMA DI RIEGO




ORANJESTAD (AAN): Hopi aña pasa e chinesnan cu DIARIO ta muestra riba potret, tabata bay tur mainta na mercado di e waf chiquito, pa bende varios berdura cultiva na Aruba mes, riba nan propio cunuco. Aunque segura semper tabata y lo sigui ta un problema pa desaroyo di agricultura na Aruba, e chinesnan aki tabata rega nan tera pa e keda fertil, y produci.

Tempo despues nan a cu-

minza bay na waf, solamente riba Diasabra. Entre otro, nan tabata bende snei bonchi, berengen, ciboyo largo, selder, warmoes, conchomer chines, y diferente otro berdura.

Ora cu e mercado na waf a worde moderniza, e chinesnan no a bin mas. Aparentemente e prijs di huur tabata mucho caro pa nan. Anto tabata na nan mes lugar nan tabata bende nan cosecha. Hopi tabata esnan cu tabata bay cerca nan riba Diadomingo.



DIARIO a bishita nan cunuco recientemente, ubica na San Miguel, Bubali, na momento cu nan tabata traha den nan plantacion.

Actualmente nan tin sembra, entre otro, di selder, Yambo, sibollo, calbas largo, conchomer, spashi, "so-propo", warmoes, y yerbanan chines cu nan ta yama "am-soy" y "toisom", cu nan ta cushina mezcla cu arroz. Loke nan ta cultiva nan ta bende cu diferente lugar na Aruba, entre otro, restaurantnan chines.

SECURA

E trabao di prensa aki a resulta pa DIARIO uno hopi interesante, mirando e senciyez

cu cualnan e chinesnan aki ta biba aden, pero con nan a traha un sistema rustico di riego. Nan ta dispone di un pos grandi cu ta alimenta 5 pos mediano conecta cu un sistema di tuberia traha pa nan mes, cu cual nan ta mantene parti di e tera fertil, y nan productonan completamente verde. Den e tuberia nan ta conecta un manguera y di e manera aki nan por rega awa den un y otro plantacion.

Ta lastima si di a mira con parti di nan cosecha y tera a bay perdi pa motibo di segura. Riba potret nos ta muestra esey. E personanan aki no ta ricibi ningun sorto di subsidio y por a ripara cu nan ta biba hopi humilde mes, pero ta dedica na nan cunuco. Hende

muher ta traha pareu cu homber tanto pa sembra como pa recoge e cosecha, no importa con cayente solo ta.

DIARIO tin entendi cu ademas di e chinesnan tin hende local cu tambe tin nan propio cosecha, algun di nan pa nan propio consumo. Na Moko 7 por ehemplo, tin señor Boekhoudt cu tambe ta planta berdura, fruta y flor, pero nan no ta ricibi ayudo di ningun instancia.

Kiernen cu desaroyo di agricultura na Aruba no ta imposible. Lo ta bale la pena pa instancianan concerni muestra interes den e agricultornan chiquito aki, y duna nan un man pa nan produci cu un vision comercial mas amplio riba nos mercado.

